

Newtbec

NEW WAY OF BEING CHURCH

Pembaptisan Tuhan

HARAPAN: PERCAYA, HIDUP DAN MEMBERI


TEMA BULANAN:
SABDA TELAH MENJADI DAGING

MENJADI MURID BERPENGHARAPAN

Dalam bacaan pertama, kita menjumpai satu bahagian dalam kitab Yesaya yang dikenali sebagai 'Nyanyian Hamba'. Secara umum, ini merujuk kepada bangsa Israel, yang di antara semua bangsa di dunia dipilih dan ditebus oleh Allah, dan oleh kerana itu, melayani Dia. Namun, lebih khusus lagi, 'Nyanyian Hamba' merujuk kepada individu yang misinya menjadi lebih jelas ketika petikan kitab suci diteruskan. Roh Tuhan akan turun ke atasnya dan dia akan membawa keadilan kepada para bangsa, tetapi dengan cara yang tidak ganas atau tidak agresif. Dia diutus untuk membuka mata orang buta dan membebaskan orang yang tertindas.

AYAT KITAB SUCI MINGGU INI:

Marilah kita teguh berpegang pada pengakuan tentang pengharapan kita, sebab Ia, yang menjanjikannya, setia

(Ibrani 10: 23)

Nubuatan Yesaya seperti yang terdapat dalam 'Nyanyian Hamba' menjadi pemenuhan dalam Peribadi Yesus. Petikan Injil menjelaskan bahawa melalui pembaptisanNya, yang menandakan permulaan pelayanan umumNya, Yesus diakui di hadapan orang sebagai Anak Allah. Ini menyiapkan jalan bagi pembaca Injil untuk melihat pentingnya segala sesuatu yang Yesus akan lakukan di sepanjang hidup dan di dalam pelayananNya. Kata-kata dan tindakanNya akan menggambarkan siapa Dia - Anak Allah sendiri. Dengan Yesus, masa baru di bawah kuasa Allah telah dimulakan dan rencana Allah akan dipenuhi. Petikan Kisah Para Rasul dalam bacaan kedua menggambarkan manifestasi kuasa Allah dalam nama Yesus melalui Petrus yang mengaku nama Yesus, dan kemudian membaptiskan Kornelius dan keluarganya.

Cabaran dan rintangan baru akan selalu timbul, tetapi misi yang diterima semasa Pembaptisan kita tetap sama. Maksudnya, untuk memberitakan Injil dengan kuasa Allah dengan menjangkau orang di sekitar kita sehingga Kristus dikenali. Adalah penting bagi kita untuk terus dan bertahan dalam misi ini walaupun dalam menghadapi realiti "norma baharu" dan situasi politik, sosial dan ekonomi semasa. Ramai orang mungkin merasa cemas dan tidak yakin akan masa depan dan perlu merasa ada pengharapan. Tahun ini kita dipanggil terutamanya oleh Gereja di Semenanjung Malaysia untuk menjadi Murid Harapan - untuk percaya, hidup dan memberi harapan. Semoga kita menyahut undangan ini dengan kasih, keberanian dan semangat.

Tuhan, semoga aku melihat kuasaMu berkarya dalam hidupku. ✝